

新纂雲南通志卷二百三十一目錄

儒林傳

清

王崧

吳桐

杜允中

吳樹聲

張適栻

楊勳

鄒澤

呂存德

新纂雲南通志卷二百三十一

儒林傳

托克托修宋史於儒林傳外另立道學一門爲識者所譏以其不解儒字之意義也本編仿明史儒林傳例將鄉先達之長於經學理學者採入泯門戶之見鎔漢學宋學於一爐俾後人有所則倣焉

清

王崧字樂山浪穹人家世襲土職雄殖貲產多藏書崧少穎特博學強記深通經史百家嘉慶初成進士出爲山西武鄉令主講晉陽書院罷歸里主修滇志旋卒崧說經宗漢儒家法著說緯六卷析諸儒之異同而補其闕短多采子史取証古訓務詳實折衷羣經崧謂唐宋諸儒辨堯舜時事多失實悖戾經義原伏生所傳尙書自若稽古

新纂雲南通志

卷二百三十一

儒林傳 清

一

帝堯至陟方乃死皆爲堯典文別有舜典文一篇佚而不傳孟子言瞽象殺舜事多引逸篇文宋司馬光蘇軾二程子以爲焚廩拚井事不近人情疑戰國人矯造萬章隨俗之言孟子未及察史遷承謬不改後之梁玉繩崔述皆同宋人說此乃諸儒之蔽也古之天子皆一國之君德能治天下天下始奉以爲主堯由唐侯爲天下主舜父瞽瞍亦虞國之君左氏傳曰自幕至於瞽瞍無違命舜重之以明德故四岳師錫稱爲虞舜二女釐降亦曰嬪于虞虞者舜上世有國之名非既有天下始以虞爲號也舜於瞽瞍爲冢子瞍欲傳象以爵土而難于舜是以常欲殺舜舜順適父意不失子道欲殺不可得欲求常在側而瞍欲殺之意亦寢止矣書所謂克諧以孝烝烝乂不格姦者此之謂也顧象堅欲奪舜嫡又其母日讒譖舜于瞍瞍從二人言逐

舜居外而不爲娶舜耕歷山而于田號泣此未受堯養時事也舜自見逐歷耕稼陶漁一年而所居成聚二年成邑三年成都孟子稱象呼舜爲都君左傳凡邑有宗廟先君之主曰都舜所居三年成都都人奉以爲君猶泰伯逃荆蠻歸者千餘家遂君於吳當是時舜即不爲堯用立能自立國瞽既逐舜不患象不嗣瞽象知舜爲堯所養妻其二女而欲殺之念又生故焚廩拵井乃既受堯養未爲堯舉時事孟子固云養舜於畎畝後舉而加諸上位堯之九男二女百官牛羊倉廩干戈琴張衫衣以賜舜當有次第非在一時也初試于畎畝見可用而後使主祭主事故曰我其試哉自焚廩拵井不能殺舜瞽象亦知舜不當殺舜已爲堯用日見尊任至于禪位瞽象益爲舜所化夫國君之子見棄於親未有室家越在草莽而卒爲天子故曰匹夫

而有天下非如史記所謂微爲庶人也崧又訓舜典陟方乃死曰案周禮夏官凡涉土地之事皆以方名如職方土方懷方合方訓方形方之屬皆是方相氏所掌大喪先匱及墓入壙以戈擊四隅歐方良漢書張湯傳調爲茂陵尉治方中注孟康曰陵上土作方也如淳曰漢法陵方中用地一頃深十二丈師古曰古謂掘地爲阬曰方今荆楚俗土功築作算程課者猶以方計田延年傳昭帝大行時方上事暴起注方上謂壙中也陟與殂對方與落對書紀二帝之崩不同辭非互文也堯以不得舜爲己憂舜既敷治可以殂落堯崩而舜在無異於堯之在故不曰乃死舜之生也天若爲堯三十而舉以敷治至陟方時而敷治已終故曰乃死死者生之終也能終堯之事即無異於堯經於堯不言帝殂落於舜不曰陟方死而皆綴以乃乃者難辭

又繼事之辭辭之緩也舜敷治而堯乃殂落舜終堯事而陟方乃死其辭不可以相易易則事理有乖崧好據經言史事廣撫博討不爲怪誕異衆之論議皆典則可觀治春秋易尤精絕嘗以爲春秋隱元年實周平王四十九年諸儒皆言周室東遷而春秋託始案平王元年爲魯孝公三十七年文因魯史自不得以孝公殘年爲書首惠公之立當平王三年取時之相接宜始于惠然孔子舍惠公一代事不紀而以隱元託春秋始何耶案竹書紀年稱幽王三年王嬖褒姒五年太子宜臼出奔申八年立褒姒子伯服爲太子十一年申人鄩人及犬戎入宗周弑王殺鄭桓公犬戎殺王子伯服執褒姒以歸申侯魯侯許男等立宜臼于申虢公翰立王子余臣於櫛是謂櫛王二王並立平王元年東徙洛邑錫文侯命二十一年晉文侯殺王子余臣

于櫛據紀年文以觀平王既立于申自申遷雒而復使周人爲之成申則申侯之伐幽王之弑不可謂非平王之志當時諸侯第知其冢嫡爲當立而不察其與聞乎弑君父之可誅虢公立余臣蓋有見乎此也自平王錫文侯命報立己功而并望其殺櫛王之效櫛王死而平王位定後世成敗論人遂謂平王能繼文武之緒而惜其棄岐豐七百里之地豈篤論哉孔子生二百年後言有所不忍故於書錄文侯之命于詩錄揚之水作春秋以正名分存天子之統余臣在而西周尙存春秋可以不作余臣替而周竟爲東聖王不作宜臼本弑逆亦不得不以王者裔而存天子之統然文因魯史必取魯君之元年爲書首前乎隱者孝惠二君孝之元年當宣王世周末東而正盛惠之元年在平王三年西周之王猶在東保洛者獨平王耳平王歷年

二十有一而攜王替四十有八而隱公立至是西周亡二十九年矣
西周亡而王迹熄春秋不可不作魯君建元與東周之王相接者非
隱其誰哉夫春秋託始於隱有四義焉天子無德威僅可定其位于
文武之裔一也世衰道微天下無共主不得已而戴弑逆之王使諸
侯不敢萌僭竊心二也棄舊都於西戎肇後世之邊釁三也崇隱之
讓傷桓之弑四也平隱之際時運之所遭具此四義一操筆而包有
之非聖人孰能爲哉其言易象也以漢世有河圖九篇洛書六篇外
別有緯書三十篇隋書經籍志河圖二十卷河圖龍文一卷又梁河
圖洛書二十四卷亡是河圖洛書皆有篇卷著錄緯書雖多妄託要
皆依附經文河洛既別有緯未可謂無本書宋陳邵之二式即漢唐
之河圖九宮其分爲二者術數家所謂本宮飛宮漢晉雖無是圖而

有其說唐且設之爲壇疑其學出於歸藏而與周易時有所合諸儒
謂僞造理殊未洽作河圖洛書考一篇文多故不備錄始阮元總會
試得崧崧年實長於元元總督雲貴崧年七十餘始出所著說緯六
卷謁元元讀而愛好之重賞其才因上書京師存四庫今拾其經義
大要著于傳爲成學治國故者考覽焉

黎訥撰墓志
銘說緯

吳桐字鳳崗一字琴仙甯州人少孤母李守節撫教甚有賢惠稱道
光元年桐與其兄鎔俱以年少能誦詩書見知于學使補邑庠生浪
穹王崧南中大儒時居昆明主修滇省志桐兄弟往從受學崧歸因
詣五華書院修業居數年桐選拔貢生而鎔登賢書第二人皆博通
才藝專授弟子經所成才稱盛其後滇亂桐鎔募鄉兵討賊有功大
府奏桐加花翎三品銜選補知府鎔以知州用皆卒於家桐爲學一

宗本師稽古說經詳核而不鑿平正而不偏於漢宋均采其長不立門戶之見所著書有樂府詞曲考三易說尙書古文今文說甘誓牧誓湯誓泰誓辨詩序及南陔六篇考狸首解蜀王杜宇考合十餘篇桐季弟焜焜子崇烈皆有文行崇烈尤能傳桐業云

王寶書撰傳

杜允中字伯欽浪穹人父暘嘗從王崧受學浪穹在府北百三十里府在雲南省城西北八百餘里府城在京師西南九千餘里即距楚豫文物地亦六七千里故縣人之負瑰偉擅鴻博者仕罕躋顯要名不越鄉閭譬夫重淵絕壑魚生其中長潛而不能見允中悲之因又以潛庵自號其家藏有史記漢書通鑑諸書允中自塾中受讀四書五經歸即檢閱久而通其大義從親黨假其未見者邑中十三經有注而無疏允中盡讀之崧宦山西著說緯寄里門允中見其引用各

書按其名索借以觀然未嘗習帖括求試於有司也崧謝病歸允中往謁代解囊橐卷帙充屋宇則大喜日夜求讀凡子史百氏及唐宋人說部目耕殆遍崧覘其所學已富授以制義疏其法度迫應童子試遂補弟子員仍不應鄉闈試道光六年開館纂修雲南通志崧領館職屬允中參稽典故凡某事在某書或一事而諸書各異允中皆能徵摭剖析不使漏畧書垂成而允中以積勞致疾殞年三十有一滇中人士莫不傷悼允中雖無意科第然積學既深將俟通志畢業始盡發胸中所有爲文章傳後世阮文達元爲崧座主總制滇黔嘗言滇蜀接壤於古皆號僻遠而蜀有相如子雲文學冠當時著作傳後世滇無之何耶崧舉允中以對而卒齋志以歿者非獨限於地且

阨于天也

王崧撰傳

吳樹聲字鼎堂保山人道光末秋闈中式攝沂水令勸民務農桑備水旱凶災禁制劫略盜賊屏息以治行高第察補肥城令時金田亂起齊地震恐樹聲繕完城堡治戰具益募鄉兵登埤警候邑民安堵咸樂其惠三遷章邱所至有治效同治中卒官樹聲治經好爲深湛思通音韻訓詁之學略師顧王戴段諸家法亦博覽羣籍以廣其意蔚然爲南土儒宗其治說文依宋戴侗六書故例改易說文部居成六書微百有十一卷首列建首字次建首所生之字又次新附建首字蓋取子母相生之義而後諧聲會意有所比附其大指先字形而次聲意錯綜參互仍歸於建首樹聲以爲顧炎武併唐韻五支九麻韻半數字與七歌八戈韻合爲第六部而五支韻字皆改爲歌戈一類江永古韻標準以平聲支脂之微齊佳皆灰哈尤魂戈合去聲未

怪韻字爲第二部以歌戈麻支紙寘諸韻字爲第六部說與顧氏略同而學者往往非議以爲失之武斷段玉裁出始以哈韻字爲第一部稱第一類歌戈麻支韻合爲第十七部脂微齊皆灰韻合爲第十五部支佳韻合爲第十六部稱第六類其謂周秦韻與今音異者古本音也其于古本音齟齬不相入者古合韻也是也至以古人聲歌必有一定之韻如後世之一東二冬又有一定可合之韻如後世通轉之例者其說非也古人聲歌無非天籟有籟必有音學者旣不能以後世之音盡概古人之音又豈可以古一方之音盡概當時天下之音乎蓋古人音韻皆矢口而出無部類同通之法凡與今韻異者皆古音也不必言協與合而古音中自爲異不能相合者皆方音也孔子繫易據鄒魯之音與詩魯頌韻略同合之餘詩或異屈宋南音

與兩漢續騷賦用韻多歧且古音無歌麻二部唐韻之七歌八戈九麻並起於西域其九麻韻車家等皆自魚虞模轉入七歌八戈與九麻半數字如麻加等皆自支韻施爲等字轉入樹聲于是遍舉古籍韻語以歌麻字爲韻者援引該洽精思經年成歌麻古韻考四卷正三家之失自杼獨見皆有神解樹聲于小學之書又有孟子小學一卷兩漢書小學五卷經傳釋詞續五卷合音輯畧一卷詩小學三十卷其詩小學序曰吾嘗按詩故訓其不合疊韻雙聲之例者甚多蓋三百篇中言字體有古訛段借之別言字聲與義有合音一字數義一義數用之別古字者如凱風吹彼棘心心字據易禮釋名定爲尖之古體是也訛字者如關雎君子好逋逋字據禮爾雅注定爲仇之訛體是也段借字者如碩人之藹藹字按聲類定爲窠之段借是也

合音之說起於西域趙宦光曰釋典譯法真言中此方無字可合梵音者即以二字聚作一體謂之切音是也六朝時反語盛行實皆昉自合音采苓舍旃旃字爲之焉合音搗羽王事靡盬靡字爲沒有合音此其例也一字數義者如同一介字或訓作助或訓作大或爲勾之段借或爲戒之段借一義數用者如曰與于皆語詞也女曰鷄鳴士曰昧日義近于云也見覲曰消曰嬪于京義通乎聿也黃鳥于飛之子于歸于與曰同義于彼原隰于邑于歸于訓作往作于楚宮作于楚室于讀爲爲故釋詩者或因聲以定義或從義而知聲知其爲古字而後不誤於今文知其爲訛字而後可求其正字知其爲段借字而後不蔽於所段借之字知其字之形而後可以定其聲與義知其字之聲義而後無誤於字形求其義于疊韻雙聲而不合更取諸

例旁疏博考而詩之音訓遞轉之故得矣其書精詳與段氏毛詩小學比自清乾嘉間經術考訂之學風靡南北滇處邊塞士頗尚功名涉仕祿之途學風未啟方聞博雅之士稀矣其專通經學辨古名物精識卓見與江左諸儒爭泛博者如王崧與樹聲庶幾無愧色哉

清史列傳

光緒志

張適棻字淑鑑貢生少從世父端亮學探研古籍尤反覆於程朱語錄有得於聖賢之旨每訓子弟曰聖人之學自毋自欺始燕居獨坐皆若有鬼神鑒臨求一念之肆不可得也嘗教讀得三十餘金憫其戚有不能婚者悉助之年七十五尤工書人爭重之

參師範滇紫續蒙化廳志

楊勳字剛齋昆明人道光庚子舉人性純謹事孀母以孝聞受學於昆陽李文耕之門講求理學宗法程朱居鄉以禮法自飭言行不苟

新纂雲南通志

卷二百三十一 儒林傳 清

八

會試留京爲倭相國仁所器謂其學有本源非空談者比屢試禮闈不第大挑以知縣分發四川補彭水令爲政一以簡靜爲主聽訟明決終任案無留牘邑民多默化焉所著詩文亂後散佚

光緒志

鄒澤字慰農昆明人道光丁酉舉人官甘肅通渭知縣解組歸里當道聘主育材書院講席先德行而後文藝士論翕然生平好學能文尤究心宋五子書以講明理學爲事著有欲寡過齋文集就中如道學論三篇理欲交戰論一篇皆研究有得之言而讀學部通辨一篇於學術疑似之間明辨以晰毫釐不爽此等論著均非邃於理學者不能道其隻字也澤尤重實行所著反身要語大都切己體察省心克治與紙上空談者不同方之古人殆論語所謂躬行君子者歟

秦光玉滇

文叢錄
兼採訪

呂存德字子恆鶴慶人少隨父游宦居於黔光緒戊子雲南鄉試中式再試春官上第授禮部主事卒年二十八存德敦行誼律已嚴正事上遇人一以誠信尤謹慎周密終身未嘗臧否人物掩惡而揚善人見之者亦竦然敬服戚儔有窶困無生業者候爲請託得一官階存德出囊金相贈曰幸持此勉爲衣食資奔走權門某不敏無以報命其講學宗宋五子書大要歸於植綱常明正學砥起頹俗以濟世變旣績學早死材不爲世用僅所著書曰慎思記訟過記兩種行於

世

錢用中撰傳